

阿毗達磨大毗婆沙論卷第一百二十四

堅四

五百大阿羅漢等造

唐三藏法師玄奘奉詔譯

業蘊第四中表無表納息第四之三

問頗有惟受三歸成近事不為有律儀缺減

成近事不若言有者契經所說文句差別豈

非無義如說我某甲歸佛法僧願尊憶持我

是近事我從今日乃至命終護生歸淨亦應

說有律儀缺減勤策苾芻等若無者即前契

經文句差別寧非無義何故安立一分少分

多分滿分近事耶健馱羅國諸論師言惟受

三歸及律儀缺減悉成近事問若惟受三歸

成近事者契經文句寧非無義經說近事受

律儀時於戒師前作如是說我某甲歸佛法

僧願尊憶持我是近事我從今者乃至命終

於其中間護生歸淨答彼由此表但得三歸

名為近事而未得律儀後說學處方得律儀

然彼文句非為無義由後自誓令前三歸得

堅牢故若不護生歸非淨故問若缺減律儀

成近事者便為善順一分等言所以者何若

受一名一分受二名少分受三受四名多分

具受五名滿分故云何不有律儀缺減勤策

苾芻等耶答佛觀所化機宜不同授與律儀

亦不一種如諸近事不樂捨家為攝引故佛

隨其意於五學處多少受得故彼律儀有缺

減受苾芻勤策意樂捨家為安立故制具律

儀具受乃得故彼律儀無缺減受以是世尊

內眷屬故迦濕彌羅國諸論師言無有惟受

三歸及缺減律儀名為近事問若爾契經寧

非無義如說我某甲歸佛法僧乃至廣說答

彼由此表既得三歸亦得律儀故成近事問
此惟自誓離於殺生云何由此具得五種答
由此自誓離殺為依五種律儀亦俱時得五
學處中彼為勝故以受戒者為不損生於損
生中殺為上首故以離殺為五所依又護生
言非惟離殺謂不損惱一切有情彼自誓言
我從今者乃至命盡於諸有情不害其命不
盜其物不侵其妻不行虛誑為護前四亦不
飲酒故護生言非惟離殺然有別誦言捨生
者此言意說捨殺生等略去殺等但說捨生
又捨生言顯於生類捨損惱事即五律儀皆
為遮防損生事故由此自誓方得律儀故彼
契經非為無義問若惟自誓便得律儀何故
復說五種學處答雖由自誓已得律儀而未
了知彼差別相欲令知故說五學處故彼所

說皆非無義問若爾何故說有一分等耶波
索迦耶答此說持位非說受位謂於五中持
一不持四名一分持二不持三名少分持三
持四名多分具持五名滿分尊者僧伽筏蘇
分同前二師說彼說無有惟受三歸更成近
事然有缺減五種律儀亦成近事謂彼將受
近事戒時先與戒師共詳審議如是學處我
能受持如是學處我不能受既詳議已歸佛
法僧自誓要期得爾所戒隨先詳議能受少
多今得律儀其數亦爾由此故說近事律儀
各詳議戒非勤策等戒得有此名如是說者
無但三歸即成近事亦無缺減近事律儀成
近事者如無缺減勤策等律儀各勤策等彼
亦如是問諸有但受近事律儀不受三歸得
律儀不有說不得以受三歸與此律儀為門

爲依爲加行故有說不定謂若不知先受三歸後方受戒信戒師故便受律儀彼得律儀戒師得罪若彼解了先受三歸後受律儀是正儀式但憍慢故不受三歸作如是言且應受戒何用歸信佛法僧爲彼慢纏心雖受不得問若先不受近事律儀便受勤策律儀得勤策律儀不有說不得以近事律儀與此律儀爲門爲依爲加行故有說不定若不了知先受近事律儀後方受勤策律儀信戒師故受此律儀彼得律儀戒師得罪若彼解了先受近事律儀後受勤策律儀是正儀式但憍慢故不欲受學近事律儀作如是言何用受此近事劣戒彼慢纏心雖受不得如說不受近事律儀而受勤策律儀如是不受勤策律儀而受苾芻律儀廣說亦爾問諸近事受勤

策律儀及勤策受苾芻律儀彼爲捨前律儀得後律儀不若捨前得後者何故施設論說前後律儀彼俱成就又若捨者後捨勤策爲近事時及捨苾芻爲勤策時更未受戒云何得彼近事勤策二律儀耶若不捨者彼旣成就二種律儀或復三種何故得名惟依後戒又親教師彼旣有二何故佛說後是前非答受後律儀不捨前戒謂近事受勤策律儀不捨近事五更得勤策十爾時成就十五律儀若勤策受苾芻律儀不捨前十五更得苾芻過二百五十爾時成就過二百六十五律儀有餘師說若近事受勤策律儀不捨近事五更得勤策五爾時成就十種律儀若勤策受苾芻律儀不捨前十更得苾芻過二百四十爾時成就過二百五十律儀問彼旣成就二

種律儀或復三種何故得名惟依後戒答就勝立名不應爲難如得勝位捨本劣名問彼親教師既有二種何故佛說後是前非答以勝律儀依後師得不依前故如不依彼律儀得名彼師亦爾復有說者捨前律儀問若爾何故施設論說前後律儀彼俱成就答彼論意說由前律儀資後令勝前戒勢力今時猶轉故說成就而先律儀實不成就問後捨苾芻爲勤策時及捨勤策爲近事時復云何得彼二戒耶答即由語表自誓我今還爲勤策或近事故得二律儀非成舊戒如是說者不捨前戒而得後戒彼後所受非前所受相違法故又前後戒因緣各別不應相合成十數等問若童子時受近事戒至少年位方娉妻室彼於此妻先得戒不若先得者今應犯戒

四

五

若先不得則此律儀應從少分有情處得答應言先得問若爾今應犯戒答得由別分非總相續先所受得離欲邪行非非梵行今如何犯習近自妻非邪行故謂一相續別分有多所遮所行別故無犯問若童子位得不作律儀至少年時方娉妻室彼於此妻先得律儀不若先得者今應犯律儀然不作律儀得必無犯若先不得則此律儀應從少分有情處得答應言先得廣說如前問近事律儀依何處有答依欲界有非色無色界依人趣有非餘趣依三洲有除北洲問若此律儀惟依人趣契經所說當云何通如契經說時天帝釋來詣佛所作如是言願佛憶持我是近事我從今者乃至命終於其中間護生歸淨答彼自顯示是信等流非受律儀不應爲難如

契經說近住律儀具足八支何等爲八謂離
害生命離不與取離非梵行離虛誑語離飲
諸酒諸放逸處離歌舞倡妓離塗飾香鬘離
高廣牀離非時食問此有九支何以言八答
二合爲一故說八支謂離塗飾香鬘與離歌
舞倡妓同於莊嚴處轉故合立一支問云何
名近住云何近住支答離非時食名爲近住
離害生等名近住支問此近住支應惟有七
答離非時食名爲近住亦近住支故不惟七
如正見名道亦道支餘名道支非道擇法名
覺亦覺支餘名覺支非覺三摩地名靜慮亦
靜慮支餘名靜慮支非靜慮如是離非時食
名近住亦近住支餘名近住支非近住故說
近住具足八支尊者妙音衆世說曰應言近
住或全無支或一二三乃至或七非要具八

堅四

六

方名近住如是說者非全無支乃至或七得
名近住名近住者要具八支問近住律儀云
何而得答從他教得謂隨師教自發誠言恭
敬受得問受律儀者或先自發言或與師俱
說得律儀不答不得要隨師語如師語而說
方受得故問近住律儀從誰應受答從七衆
受皆得非餘所以者何若無盡壽戒者則不
堪任爲戒師故問著何服飾受此律儀答常
所受用衣服嚴具著之皆得受此律儀若爲
暫時莊嚴身者必須棄捨方受此戒牀座等
具准此應知問齊何時受答齊一晝夜不增
不減謂清旦時從師受得至明清旦律儀便
捨問若有頓受半月一月或復多時得律儀
不答應言不得所以者何一晝夜時分限定
故光暗往來易了知故一齋食時非時定故

非一晝夜近住律儀可使頓經二晝夜受況多晝夜可頓受得如近事等盡壽律儀不可頓受二衆同分況多同分可頓受得晝夜律儀理亦應爾律儀分齊惟有二故問受晝非夜受夜非晝得此戒不有說不得所以者何佛說此爲晝夜戒故問若爾尊者^七迦多衍那所說因緣當云何通如說時彼尊者告屠兒言汝等皆應離此惡業勿於來世受大苦果屠兒答言我以此業而自存活如何能離尊者告言汝等所作屠羊等業何時分造屠兒答言惟於晝分尊者告曰汝等可於夜分受持近住八戒諸屠兒輩歡喜奉行命終皆生曠野鬼趣每於晝日有黑駝狗欻然而現噉食其肉惟餘骸骨俄頃肉生平復如舊還被食噉受諸苦惱如地獄趣每至夜分五欲自

娛遊戲受樂猶如天趣尊者復詣諸欲邪行姪女等處告言汝等應離此業勿於來世受大苦果彼人答言我等久習如是事業非卒能離尊者告言汝等所作姦穢事業在何時分彼人答言惟於夜分尊者告曰汝等可於晝分受持近住八戒諸邪行者歡喜奉行命終皆生曠野鬼趣每於夜分有百足蟲欻爾而生噉食其肉惟餘骸骨俄頃肉生平復如舊還被噉食受諸苦惱如地獄趣每至晝分五欲自娛遊戲受樂猶如天趣如是所說當云何通答彼妙行攝非是律儀受妙行果非律儀果是以無過有餘師言是彼尊者神力化作非是真實令俱胝耳獸世間故化爲彼事故不須通有說亦得謂有要期月八日等恒受齋戒有緣礙故得如是受評曰前說爲

善晝夜戒故問若至午後受此戒者亦得戒
不答應言不得除先要期月八日等恒受齋
戒彼有餘緣午前不憶食已方憶深生悔愧
即請戒師如法受者亦得此戒問扇搆半擇
迦無形二形受近住律儀得律儀不答應言
不得所以者何彼所依身志性羸劣非律儀
器亦不能為不律儀器如鹹鹵田嘉苗穢草
俱不生長然應授彼近住律儀令生妙行當
受勝果或扇搆等國王委任令知要務苦楚
多人若受律儀毒心暫息饒益多人故亦應
為受然實不得近住律儀如是所說近住律
儀或有根本業道淨而近分不淨如自在者
受此律儀有彼厨人欲害生命擬充所食彼
便告曰我今受戒不得殺生留待明朝殺充
所食復有捕獲怨敵將來請欲加害彼便告

曰我今受律儀不得殺害留待明旦依法刑
戮如是名為根本業道淨而近分不淨世尊
說彼所受律儀雖是勝業而不獲大果或有
根本業道淨近分亦淨而惡尋思之所損害
謂欲尋思恚尋思害尋思世尊說彼所受律
儀雖是勝業而不獲大果或有根本業道淨
近分亦淨非惡尋思之所損害而不攝受正
念謂佛隨念法隨念僧隨念戒隨念捨隨念
天隨念世尊說彼所受律儀雖是勝業而不
獲大果或有根本業道淨近分亦淨非惡尋
思之所損害攝受正念而不迴向解脫謂求
生天欲樂等故受持禁戒世尊說彼所受律
儀雖是勝業而不獲大果若有根本業道淨
近分亦淨非惡尋思之所損害攝受正念迴
向解脫世尊說彼所受律儀是殊勝業能獲

大果世尊依後所受律儀告毗舍佉鹿子母
曰若有成就此八近住律儀十六大國所有
珍寶欲比其價十六分中不能及一如是百
分千分百千分數分算分乃至鄔波尼殺曇
分亦不及一十六大國者謂決伽國摩揭陀
國迦尸國憍薩羅國佛栗氏國末羅國奔達
羅國蘇喩摩國頰濕縛迦國頰飯底國葉筏
那國劔跋闍國俱盧國般遮羅國筏蹉國戌
洛西那國此十六國豐諸珍寶故偏說之諸
珍寶者謂末尼真珠吠瑠璃寶螺貝璧玉珊
瑚金銀摸婆洛揭拉婆寶頰濕摩揭婆寶赤
珠右旋寶等又佛依後所說律儀訶天帝釋
所說讚頌如天帝釋聞佛所說近住律儀功
德殊勝便以伽他而讚歎曰
六齋神變月 受持八戒齋 彼功德殊勝

則為與我等

爾時世尊告苾芻眾此天帝釋所說伽他違
於道理若阿羅漢可作是說所以者何此天
帝釋貪瞋癡等未能永離未得解脫生老病
死愁憂悲苦纏縛身心如何可言受持此戒
所獲功德與我等耶諸阿羅漢諸漏已盡所
作已辦捨諸重擔自利已滿盡諸有結心善
解脫不受後有彼可說言受持此戒所獲功
德則與我等天帝功德惟感天帝受持八戒
證三菩提故不應言但與其等問誰應受此
近住律儀有作是說惟聖者非異生惟是近
事非非近事誰有為暫時捨盡壽然有為盡
壽捨盡壽為盡壽捨暫時誰有為暫時受盡
壽然有為盡壽受暫時如是說者亦聖者亦
異生亦近事亦非近事然薄伽梵為毗舍佉

鹿子母說及天帝釋所說伽他惟依聖者問
近住律儀依何處有答惟依欲界有非色無
色界依人趣有非餘趣依三洲有除北洲問
若此律儀惟依人趣契經所說當云何通如
契經說有海居龍從大海出於六齋日受八
戒齋捨身心寂然而住徐發吟韻作如是
言今於世間無所惱害答彼得妙行不得律
儀自慶暫時離諸惡行彼自憶念昔在人中
受八戒齋不能清淨有毀犯故墮龍趣中作
是思惟我本人趣若能清淨持八戒齋今應
生天受諸快樂何期毀犯墮斯惡趣厭惡行
故數從海出受八戒齋吟韻自慶然實彼龍
惟得妙行不得律儀問何故此律儀名爲近
住答近阿羅漢住故名近住以受此律儀隨
學彼故有說此近盡壽戒住故名近住有說

卷四

十一

此戒近時而住故名近住如是律儀或名長
養長養薄少善根有情令其善根漸增多故
有說長養在家善根令近出家善根住故問
如是所說八支律儀幾是尸羅支幾是不放
逸支幾是遠離支答五是尸羅支謂離害生
命乃至離飲酒一是不放逸支謂離非時食
餘二是遠離支又前四是尸羅支離性罪故
第五是不放逸支雖受尸羅若飲諸酒心便
放逸不能護故後三是遠離支以能隨順厭
離心故厭離能證律儀果故由此近住具有
八支而於五增三於十減一合二爲一故開
一名爲二故
業蘊第四中自業納息第五之一
云何自業自業是何義如是等章及解章義
既領會已次應廣釋問何故作此論答爲欲

分別契經義故如契經說佛告摩納婆世間有情皆由自業皆是業分皆從業生業為所依業能分判諸有情類彼彼處所高下勝劣契經雖作是說而未廣辯自業之義契經是此論所依根本彼不說者今應說之故作斯論尊者世友說曰世間有情皆由自業者謂自作業還自受異熟皆是業分者謂如所作業受如是異熟皆從業生者謂業為生因取異熟果生於彼彼所應生處業為所依者謂業為依因受彼彼有彼彼有具業能分判諸有情類彼彼處所高下勝劣者謂如前說彼彼生處由業分判高下勝劣云何自業答若業已得今有異熟及業異熟已生正受若業已得今有異熟者此句顯示順中有受業及業異熟已生正受者此句顯示順生有受業

卷四

十二

如順中有受順生有受應知順起受異熟順生受異熟順起受果順生受果順細果順麤果業亦爾問為由因故名自業為由果故名自業耶若由因故名自業者後句所說當云何通後句說言及業異熟已生正受若由果故名自業者前句所說當云何通謂業已得今有異熟有作是說但由因故名為自業由前句故有作是說但由果故名為自業由後句故如是說者但由因故名為自業問若爾者何故復說及業異熟已生正受答於住果位彼因方得自業之名是故尊者妙音說曰若愛非愛果已起現前彼業爾時名為自業非未造業及造業時有能現前受異熟果要業滅已果方起故自業是何義答是得自果自等流自異熟義此中有說自果者士用果

自等流者等流果自異熟者異熟果有說諸句皆顯異熟果此中說感異熟業名自業故有處等流以異熟聲說如說何等名受異熟答言愛是有處異熟以等流聲說如此中說復次此業所招異熟於自相續現熟非餘故名自業問爲此造業即此受果爲異造業異受果耶答有緣故說此造此受有緣故說異造異受有緣故說無造無受有緣故說此造此受者謂蘊處界展轉相續刹那雖異可說一故有緣故說異造異受者謂人趣造業餘趣受果餘趣造業亦爾有緣故說無造無受者謂一切法無我無有情無命者無養育者無補特伽羅空無內士夫離作者受者惟有生滅諸行聚故於自相續養隨養育隨育護隨護轉隨轉益隨益故名自業問善業異熟

堅四

十三

可於自相續能爲養等不善業異熟於自相續但爲損害如那落迦十三猛燄纏繞其身彼寧有養等耶答養等有二種一令增長二令不斷善業異熟於自相續由二事故說各養等惡業異熟於自相續但令不斷說各養等非令增長故無有過若業是自業此業當言過去耶未來耶現在耶答此業當言過去問何故此業不當言未來答非先受果後造因故問何故此業不當言現在答異熟因果不俱時故若業是自業此業成就耶答應作四句有業是自業此業不成就謂業已得今有異熟及業異熟已生正受此業已失如無間業已現在前已牽異熟果正現前此業已失由捨所依衆同分故若律儀業已現在前已牽異熟此有四種謂順現法受順次生受

順後次受順不定受果正現前此業已失由四緣故或五緣故謂捨所學二形生斷善根捨眾同分或明相出若不律儀業已現在前已牽異熟此有四種謂順現法受等如前說果正現前此業已失由四緣故謂受律儀得靜慮二形生捨眾同分若非律儀非不律儀諸餘身語妙行惡行已現在前已牽異熟此有四種謂順現法受等如前說果正現前此業已失由三緣故謂意樂息捨加行限勢過若欲界繫善不善思已現在前已牽異熟此有四種謂順現法受等如前說果正現前此業已失謂若善者由斷善根或由捨眾同分等故若不善者由離染故若惡作憂根俱生善思已現在前已牽異熟此有四種謂順現法受等如前說果正現前此業已失由斷善

堅四

十四

根故或已離染故若初靜慮順退分順勝進分順決擇分等業已現在前已牽異熟此有四種謂順現法受等如前說果正現前此業已失由已離染故或易界地等故如是乃至非想非非想處順退分等業廣說應知有業成就此業非自業謂業非已得今有異熟及業異熟非已生正受此業不失如無間業已現在前已牽異熟果未現前此業不失由未捨所依眾同分故若律儀業若不律儀業若非律儀非不律儀諸餘身語妙行惡行若欲界繫善不善思若惡作憂根俱生善思已現在前已牽異熟皆有四種謂順現法受等如前說果未現前此業不失由無前所說諸失緣故若初靜慮順退分順住分順勝進分順決擇分等業已現在前已牽異熟此有四種

堅四

十五

謂順現法受等如前說果未現前此業不失由未全離染不易界地等故如是乃至非想非非想處順退分等業廣說應知有業是自業此業亦成就謂業已得今有異熟及業異熟已生正受此業不失如律儀業若不律儀業若非律儀非不律儀諸餘身語妙行惡行已現在前已牽異熟此有二種謂順現法受順不定受果正現前此業不失由無前所說諸失緣故若欲界繫善不善思若惡作憂根俱生善思已現在前已牽異熟此有四種謂順現法受等如前說果正現前此業不失由無前所說諸失緣故若諸靜慮無色順退分順住分順勝進分順決擇分等業已現在前已牽異熟此有四種謂順現法受等如前說果正現前此業不失由無前所說諸失緣故

有業非自業此業亦不成就謂業非已得今有異熟及業異熟非已生正受此業已失如無間業餘眾同分中已消已受已作所作已與果已無能異熟已熟若律儀業若不律儀業若非律儀非不律儀諸餘身語妙行惡行若欲界繫善不善思若惡作憂根俱生善思若諸靜慮無色順退分順住分順勝進分順決擇分等業餘眾同分中已消已受已作所作已與果已無能異熟已熟此業已失由有前說諸失緣故非亦有四句翻是應知謂前第二句作此第一句前第一句作此第二句前第四句作此第三句前第三句作此第四句廣說如前

切有部
發智

阿毗達磨大毗婆沙論卷第一百二十四說

音釋

健 馱 梵語也 又云乾陀此云香何切 要期 伊要

免 切 期 音 也 娶 正 切 也 分 齊 諸 切 分 齊 限 量 才

其 並 約 也 娉 娶 問 也 分 齊 諸 切 分 齊 限 量 才

也 行 以 淺 歛 忽 切 也 駁 身 黑 尾 也 啞 切 子 齧

也 骸 骨 百 骸 也 皆 切 也 胠 張 尼 扇 攬 云 生 謂 也 此

然 生 者 男 根 不 半 擇 迦 梵 語 也 此 云 變 也 鹹

滿 也 撝 丑 皆 切 不 半 擇 迦 梵 語 也 此 云 變 也 鹹

澁 唐 刺 喻 許 及 筏 蹉 七 何 切 拉 落 合 切 法 丘 也 鹹